

Morning Dogri (NSD) National News Bulletin 19-08-2024

आकाशवाणी

- मुल्खै च मंकी पाक्स लागै दी स्थिति दी समीक्षा करने लेई सरकारै इक उच्ची सतह दी बैठक लोआई।
- सूचना ते प्रसारण मंत्री अश्विनी वैष्णव होरें सरकारी सेवाएं च लैट्रल एंट्री दी कांग्रेस आस्सेआ नुक्ताचीनी कीते जाने दी इक पखंड करार दिंदे होई आखेआ ऐ जे एह बवस्था कांग्रेस दे शासन च गै शुरू कीती गई ही।
- विदेश मंत्री डॉ.एस.जयशंकर होर अज्ज नमीं दिल्ली च नेपाली विदेश मंत्री आरजू राणा दयोबा हुंदे कन्नै दपक्खी बैठक लांगन।
- मुख्य भरै च अज्ज भ्राएं भैहणें दे हिर्ख दा प्रतीक रक्खड़ी दा ध्यार पारम्पारिक श्रद्धा ते उत्साह कन्नै मनाया जा'रदा ऐ।
- 2024 दी श्री अमनाथें दी यात्रा अज्ज सम्पन्न होई गई। ऐकती 5 लक्ख कोला मते श्रद्धालुएं पवित्र गुफा च मत्था टेकेआ।
- कोलकाता दे त्रै बड्डे फुटबाल क्लबें किट्टे रलियै इक महिला डाक्टर कन्नै दुष्कर्म ते हत्या आली वारदात पर जबरदस्त विरोध प्रदर्शन कीता।

<><><><><><>

Centre M.Pox

प्रधानमंत्री हुंदे प्रधान सचिव पी.के.मिश्रा हुंदी अध्यक्षता च कल इक बैठक लाई गई जेहदे च देश च मंकी पाक्स कन्नै निबड़ने दी तैआरिएं ते जन सेहत उपाएं दी स्थिति दी समीक्षा कीती गई। इस मौके मिश्रा होरें आखेआ जे प्रधानमंत्री नरेन्द्र मोदी होर मंकी पाक्स दी स्थिति दी लगातार निगरानी करा'रदे न। प्रधान सचिव नै राज्यें च इस बमारी दा तौले पता लाने दे प्रभावी उपाएं करने ते एहदी निगरानी बधाने दे निर्देश दित्ते। उनें इस कम्में आस्तै प्रयोगशालाएं दे नेटवर्क गी बधाने आस्तै आखेआ। फिलहाल देश च मंकी पाक्स दी जांच आस्तै 32 प्रयोगशाला हैन।

डॉ. मिश्रा होरें आखेआ जे इस बमारी दे इलाज ते रोकथाम दे उपाएं दा बड़डे स्तर पर प्रचार कीता जाना चाईदा। उनें मंकी पाक्स दे लक्षण ते रोकथाम दे उपाएं बारे स्वास्थ्य कर्मिं च जागरूकता बधाने पर जोर दित्ता। देश च फिलहाल मंकी पाक्स दा कोई मामला सामने नेई आया ऐ ते एह्दे मते फैलने दा जोखम बी घट्ट ऐ। मंकी पाक्स दा संक्रमण आम तौर पर 2 थमां 4 हफ्ते तोड़ी रौहदा ऐ। आम दिक्खभाल ते इलाज कन्नै मरीज स्वास्थ्य होई जंदा ऐ। लम्मे चिरें तोड़ी संक्रमित शक्स दे संपर्क च रौहने कन्नै मंकी पाक्स दा संक्रमण होंदा ऐ। विश्व स्वास्थ्य संगठन नै अफ्रीका दे केई हिस्सें च बड़डे पैमाने पर मंकी पाक्स दे संक्रमण गी दिक्खदे होई 14 अगस्त गी इसी अंतर्राष्ट्रीय स्तर दी स्वास्थ्य आपदा घोषत करी दित्ता हा। विश्व स्वास्थ्य संगठन दे मताबक 2022 थमां अजें तोड़ी 116 देशें च मंकी पाक्स करी 90 जहार शा मते लोक संक्रमण होए न ते 208 लोकें दी मौत होई गई ऐ।

<><><><><><>

Ashwani Lateral Entry

सूचना प्रसारण मंत्री अश्विनी वैष्णव होरें नौकरशाही च पार्श्व प्रवेश यानि लेट्रल एंट्री दी कांग्रेस पार्टी आस्सेआ कीती जा'रदी नुक्ताचीनी गी पखंड दस्सेआ। हाल च गै संघ लोक सेवा आयोग यूपीएससी नै केन्द्रीय मंत्रालयें च 45एं संयुक्त सचिवें, निदेशकें ते उप-सचिवें दे 45एं औहदें गी पुर करने लेई इक विज्ञप्ति जारी कीती दी ऐ। जेह्दे पर विपक्षी पार्टिं सोआलिया नशान पुट्टेआ ऐ। अपनी इक सोशल मीडिया पोस्ट च श्री वैष्णव होरें आखेआ जे कांग्रेस पार्टी दी अगुवाई आली यूपीए सरकार नै गै लेट्रल एंट्री दी पिरत पाई ही। उनें दस्सेआ, 2005 ब'रे च कांग्रेस लीडर वीरप्पा मोइली हुंदी अध्यक्षता आले प्रशासनिक सुधार आयोग नै उत्कृष्ट विशेषज्ञें दियां सेवां लेइयै खाली पेदे औहदें भरने दी सिफारश कीती ही। एह्दे थमां पैहले लोकसभा च विपक्ष दे नेता राहुल गांधी होरें आखेआ हा जे लेट्रल एंट्री कन्नै आरक्षण नीति पर माड़ा असर पौग।

<><><><><><>

Nepal

विदेश मंत्री डॉ. एस.जयशंकर होर अज्ज नमीं दिल्ली च अपने नेपाल हमरूतबा आरजू राणा दयोबा हुंदे कन्नै गल्लबात करगन। डॉ. दयोबा होर भारत दे 5 रोजा यात्रा आस्तै कल नमीं दिल्ली पुज्जियां हियां।

विदेश मंत्रालय नै अपने इक ब्यान च आखेआ जे उंदी एह यात्रा भारत ते नेपाल बश्कार लगातार उच्च स्तर दे लैन—दे नदी परम्परा दे मताबक ऐ। मंत्रालय नै आखेआ जे नेपाल भारत दी “गोआदी पैहले” नीति च प्राथमिकता आला देश ऐ। एहदे च आखेआ गेआ जे इस यात्रा कन्नै दौनें देशें गी दपक्खी मदद च बाढ़े पर चर्चा ते समीक्षा करने दा मौका मिलोग ते एह यात्रा रिश्ते गी अगगे बधाने च मददगार साबत होग।

<><><><><><>

DG Coast Guard

भारतीय तटरक्षक बल महानिदेशक राकेश पाल हुंदा कल दिलै दा दौरा पौने कारण काल होई गेआ ऐ। ओह 59 बरें दे हे। श्री पाल होरें तटरक्षक बल दे इक कार्यक्रम च हिस्सा लैने लेई कल चिन्नेई च हे। सेहत खाब होने पर उनेंगी राजीव गांधी मैमोरियल अस्पताल पजाया गेआ पर उनेंगी बचाया नेई जाई सकेआ। राकेश पाल पिछले 34एं बरें थमां तटरक्षक बल च कार्यरत हे ते अजे पिछले बरे गै एहदे महानिदेशक बने हे।

<><><><><><>

Raksha Bandhan

भ्राह्—भैहण दे बश्कार खास रिश्ते दा प्रतीक रक्खड़ी दा ध्यार अज्ज जम्मू सनें पूरे देश च मनाया जा’रदा ऐ। इस खास दिन भैहणां अपने भ्राएं गी रक्खड़ी बन्नदियां न ते परमात्मा कोला उंदी खुशहाली—अच्छी सेहत दी कामना करदियां न। भ्राह् बी अपनी भैहणें गी तोहफे दिंदे न ते उंदी रक्षा करने ते हर मौके साथ देने दा वचन दिंदे न। बजारें च ध्यार दी रौनक साफ दिक्खी जाई सकदी ऐ खास करियै रक्खड़िएं ते मठाई दी हट्टिएं पर। इस बारी अपने देश च बनाई गेदिएं रक्खड़िएं दी मंग बधी ऐ। प्रधानमंत्री नरेन्द्र मोदी हुंदा वोकल फॉर लोकल नारे दा असर दिखने गी लब्भा’रदा ऐ की जे महिलां चीनी रक्खड़ियां नेई खरीदा दियां न जेहदे करी मकामी रक्खड़ी बनाने आले खासे खुश न।

<><><><><><>

President

राष्ट्रपति द्रौपदी मुर्मू होरें देशवासिणं गी रक्खड़ी दे ध्यार दी मुमारखां दित्तियां न। अपने सनेह च राष्ट्रपति होरें आखेआ जे रक्खड़ी दा ध्यार भैहण—भ्राह्म दे प्यार दे डूंहगेपन गी दस्सदा ऐ ते भैहण—भ्राह्म च आपसी विश्वास ते अनूठा रिश्ता होर मजबूत होंदा ऐ। राष्ट्रपति होरें आखेआ जे एह ध्यार धार्मिक ते सांस्कृतिक हर्दे शा बधियै पूरे देश च प्यार ते हिर्ख कन्नै मनाया जंदा ऐ ते एह ध्यार महिलाएं दे हितें दी रक्षा दे साढ़े धेइयै गी होर मजबूत करदा ऐ।

<><><><><><>

Delhi Metro Raksha Bandhan

दिल्ली मेट्रो रेल कारपोरेशन—डीएमआरसी नै रक्खड़ी दे ध्यार दे मौके पर यात्रिणं दी सहूलियत आस्तै बाढू रेलगड्डियां चलाने दी बवस्था कीती ऐ। दिल्ली मेट्रो नै यात्रिणं गी ऑनलाइन क्यूआर टिकट खरीदने आस्तै डीएमआरसी मोमेंटम-2, वट्सऐप, पे-टीएम, एमाजान जनेइणं मोबाइल ऐप दा इस्तेमाल करने आस्तै आखेआ ऐ। रश गी दिक्खदे होई बाढू टिकट काउंटर गी खोलने दा इंतजाम कीता गेआ ऐ।

<><><><><><>

Jharkand

झारखंड दे साबका मुखमन्त्री चंपई सोरेन होरें आरोप लाया ऐ जे झारखंड मुक्ति मोर्चा च उंदा अपमान होआ ऐ। इक सोशल मीडिया पोस्ट च सोरेन होरें आखेआ जे जिसलै हेमंत सोरेन जेल दा बाहर आए, उसलै उनेंगी मुखमन्त्री औहदे थमां स्तीफा देने आस्तै मजबूर कीता गेआ। एहदे नै उंदी भावनाएं गी ढेह पुज्जी ऐ। उनें आखेआ जे उंदा पार्टी गी नुक्सान पजाने दा कोई इरादा नेई ऐ मगर मजूदा हालातें गी दिक्खदे होई उनें दूआ विकल्प चुनने आस्तै मजबूर करी दित्ता ऐ।

<><><><><><>

Amarnath Yatra

2024 बरें दी श्री अमरनाथ जी दी यात्रा अज्ज सम्पन्न होई गई ऐ। आकाशवाणी संवाददाता नै जानकारी दित्ती ऐ जे शिवें दी पवित्र छड़ी मुबारक अज्ज बडलै मूंह न्हरे पवित्र गुफा च पुजजी ते उत्थें रिवायती पूजा पाठ दे कन्नै गै 43 दिनें तोड़ी चली दी एह सलाना यात्रा सम्पन्न होई गई। पवित्र छड़ी दे संरक्षक महंत दीपेन्द्र गिरी हुंदी अगुवाई च साधुएं दे जत्थे नै जंदी रातीं पंचतरणी च बसाह कीता ते अज्ज बडलै छड़ी मुबारक गी पवित्र गुफा च आंदा गेआ। 29 जून गी शुरू होई दी इस यात्रा दरान 5 लख कोला मते श्रद्धालुएं पवित्र गुफा च मत्था टेकेआ। यात्रा गी पूरी चाल्ली रमानदारी ते बवस्था आले ढंगै सिर तोड़ चाढ़ने लेई प्रशासन श्री अमरनाथ जी श्राईन बोर्ड ते होरने सुरक्षा अजेंसिएं आस्सेआ सुददे बंदोबस्त कीते दे हे। इस यात्रा दरान श्रद्धालुएं दी सुविधा लेई मुख्यै दे बक्ख-बक्ख हिस्से थमां आइयै यात्रा रस्ते च लंगर लाने आले संगठन दी बी अहम भूमिका रौंहदी ऐ।

<><><><><><>

Football Fans

कोलकाता दे त्रै मशहूर फुटबाल क्लब “मोहन बागान”, “ईस्ट बंगाल” ते मोहम्मडेन स्पोर्टिंग” दे समर्थकें आर.जी.कर मैडिकल कालेज च इक महिला डाक्टर कन्नै दुष्कर्म ते हत्या आली वारदात दे विरोध च इकजुट्ट होइयै कल कोलकाता च विरोध प्रदर्शन कीता। साल्ट लेक स्टेडियम दे बाहर मोहन बागान दे कप्तान सुभाशीष बोस, चंदी घरै आली कस्तूरी छेत्री ते ऑल इंडिया फुटबाल फेडरेशन दे अध्यक्ष कल्याण चौबे होरें पीड़ित डाक्टर लेई न्याय दी मंग कीती। सुभाशीष बोस नै आखेआ जे एह पैह्ला मौका ऐ जिसलै न्याय लेई त्रौनें फुटबाल क्लबें दे समर्थक इकजुट्ट होए न। स्टेडियम च मोहन बागान ते ईस्ट बंगाल बश्कार डूरंड कप डर्बी मैच खेड्डेआ जाना हा पर प्रशासन नै सुरक्षा कारणें करी इसी रद्द करी दित्ता।

<><><><><><>

West Bengal

पच्छिम बंगाल दे राज्यपाल गी बी आनंद बोस होरें राज्य दे सारे मैडिकल कालेज ते अस्पताल प्रशासन गी परियरें च सुरक्षा बधाने दा निर्देश दितता ऐ।

पिछले हफ्ते कोलकाता दे आर.जीकर मैडिकल कालेज ते अस्पताल च इक जूनियर डाक्टर दे बलात्कार ते हत्या मगरा एह निर्देश दित्ता गेआ ऐ। राज्यपाल नै अस्पताल दे अधिकारिणं गी एह पक्का करने आस्तै आखेआ ऐ जे ओ अस्पताल च महिला डाक्टरें ते पैरा मैडिकल गी पूरी सुरक्षा मुहैया करोआन। सर्वोच्च अदालत नै इस घटना दी जंदी संज्ञान लैता ऐ। भारत दे मुख्य न्यायधीश डी.वाई.चन्द्रचूड़ हुंदी अगुवाई च त्रै न्यायधीशों दी पीठ कल इस मामले दी सुनवाई करोग।

<><><><><><>

Weather

तमिलनाडू पुदुचेरी, कराईकल, नागालैंड, मणिपुर, मिजोरम ते त्रिपुरा दे किश हिस्सें च अज्ज तेज बरखा पेड़ सकदी ऐ। मौसम विभाग नै जम्मू, मराठावाड, कंडे कन्नै लगदे आंध्रप्रदेश दे क्षेत्र ते यनय च बी तेज बरखा दा अनुमान लाया ऐ। विभाग नै आखेआ ऐ जे जम्मू कश्मीर, लद्दाख, गिलगित, बल्तिस्तान, मुज्जुराबाद, हिमाचल प्रदेश, उत्तराखंड, पूरी उत्तर प्रदेश, केरल, माहे ते लक्षद्वीप च इस हफ्ते हल्की थमां दरमेयानी बरखा पेड़ सकदी ऐ।

<><><><><><>